



Demant Armina Halitovića na vijest: Gdje je završilo 10% od kredita 3,5 miliona KM za kanalizacionu mrežu

 Свиђа ми се {  Tweet



Poštovani urednici portala sanainfo.ba,

Objavili ste tekst, odnosno pismo, čiji su autori, kako se navodi, nezadovoljni građani Bosanske Krupe, čime narušavate moj ugled, kako čovjeka tako i Općinskog načelnika. Zašto? Zbog toga što ste dozvolili da se u javnost iznese niz neistina, ali i optužbi za radnje zbog kojih bih već davno trebao biti iz rešetaka. Razmišljao sam da li uopšte da reagujem na tekst, na pokušaje pojedinaca koji na prjav i nedemokratski način pokušavaju okaljati moju čast da bi sebe uzdigli i zadobili povjerenje glasača na predstojećim lokalnim izborima, ali sam odlučio razjasniti neke stvari zbog poštenih građana kojih na svu sreću ima više od onih koji se potpisuju kao autori.

Nije istina da je načelnik Armin Halitović 2009. godine podigao kredit sa kamatnom stopom od 11%. Istina je da je 18.11.2010. godine sklopljen ugovor o kreditu između Federalnog ministarstva finansija i Općine Bosanska Krupa sa namjenom „Sakupljanje i tretman otpadnih voda u Bosanskoj Krupi“ u okviru projekta „Vodoopskrba i Sanitacija u Federaciji BiH“, iz kreditnih sredstava Evropske investicione banke (EIB), u iznosu od 3.536.325 KM, sa dospeljećem od 25 godina, grace periodom 6 godina (od 2013. do 2018. godine) i kamatnom stopom od 1,5%, a ne 11%. Početak realizacije navedenog kredita je 2013. godina i kamata se plaća na povučena sredstva.

Nije tačno da su kreditne obaveze Općine na godišnjem nivou oko 900.000 KM. Kredit od Razvojne banke FBiH, sa namjenom kupovine i uređenja Poslovne zone „Pilana“ je realiziran polovinom 2011. godine sa grace periodom. U 2012. godini je počela otplata anuiteta koja teče redovno. Obaveza po ovom kreditu, na godišnjem nivou, iznosi oko 300.000 KM i završava polovinom 2018. godine. Nije tačno da Općina plaća kredit koji je realiziralo JKP.

Na osnovu odluke Općinskog vijeća, Općina je dala garanciju za kredit koji relizira JKP „10. Jul“. Do dana pisanja ovog akta, data garancija nije aktivirana i Općina ne otplaćuje navedeni kredit.

U pismu se navodi da kreditori trenutno traže reviziju glavnog projekta koji se odnosi na kanalizaciju jer se ne zna šta je urađeno i koliko sve košta i šta je sve obuhvaćeno ovim projektom. To također nije istina. Kreditnim sredstvima EIB se finansira projektna dokumentacija, kao i revizija projektne dokumentacije koja je završena 2015. godine. Ove institucije se kontinuirano izvještavaju.

Navodi se da su sredstva u iznosu 1,5 miliona KM utrošena u polaganje neodgovarajućeg profila cijevi i da pri tom nije urađen nijedan kolektor. Istina je da su uložena grant sredstva i da je profil cijevi određen glavnim projektom a ne napamet i naprotiv – rađeni su isključivo kolektori.

Neistina je da postoje objekti koji se ne mogu priključiti na glavni vod kanalizacije jer je primarna kanalizaciona mreža projekta viša od sekundarne mreže. Na izgrađene kolektore mogu se priključiti sva planirana naselja. Izgrađeni su dijelovi primarnih kolektora, a mreža sekundarnih kolektora prihvata odvodnju iz objekata i vodi je do glavnih kolektora.

U pismu se kaže da je u Gimnazijskoj ulici kanalizacija urađena ranije, da bi ista ponovo bila obuhvaćena kroz projekt, što znači da je urađena dva puta za iznos od 100 000 KM. To je još jedna notorna laž. U gimnazijskoj ulici nije rađen fekalni kolektor.

Kada je riječ o izvođaču radova reći ću da se odabir firme vrši se po sistemu javnih nabavki, a vrše ga stručna lica ispred općine i FMPVIŠ, odnosno AzVPSRS. Činjenica da se nijedan od ponuđača nije žalio na ovako vrijedan ugovor sama po sebi govori o tome da li je ponuđač odabran u skladu sa Zakonom o javnim nabavkama.

Kaže se i da su sredstva utrošena bez ikakve kontrole što je apsurdno. Kontrolu vrši konzorcij firmi Louis Berger i ILF.

A što se tiče mojih nekretnina, stana u Sarajevu i vile na Pagu, molio bih "grupu nezadovoljnih građana" da me informišu gdje se tačno nalaze i kod koga su ključevi jer mi zaista mogu biti od koristi?

U sve ovo što sam naveo, svaki građanin kao i sve nadležne institucije se vrlo jednostavno mogu uvjeriti. Ovom ih prilikom pozivam da dođu u Općinu Bosanska Krupa i istraže sve navode u pismu, te naravno ukoliko ima nepravilnosti najoštrije sankcionišu počinioce.

Na osnovu navedenog Kodeksa i članova tog kodeksa tražim da objavite ovo reagovanje.

Obavještavam Vas da ću se po ovom pitanju obratiti i Vijeću za štampu u Bosni i Hercegovini koje je regulativno tijelo za štampane i online medije u našoj zemlji, a ukoliko se oglušite o ovaj zahtjev morat ću upotrijebiti i druge zakonom predviđene radnje kako bi zaustavio prijavu kampanju koja se vodi protiv Općine Bosanska Krupa i mene lično.

S poštovanjem;

OPĆINSKI NAČELNIK

Armin Halitović